



Siunnersuut uunga: Radiukkut tv-kkullu aallakaatitsisarneq pillugu Inatsisartut Inatsisaat nr. XX, XX.XXX 2014-imeersoq.

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)
(Siullermeenera)

Demokraatini siunnersuutip matuma annersaa iluarisimaarparput annertigullu ilalertariaqartut isigalugu.

Naalakkersuisulli KNR-p siulersuisuisa katiternissaannut tunngatillugu allannguutissat annertuut siunnersuutaat isumaqatiginngilluinnarparput. Allannguutissatut siunnersuutigineqartut kikkut tamat oqartussaaqataanerannut tunngavinnut tulluutinngillat. Demokraatini peqataaffigerusunnngilarput KNR-p siulersuisuini ilaasortassat amerlanersaasa Naalakkersuisunit toqqarneqartalermissaat.

Ullumikkut siulersuisuni ilaasortanit arfineq-marluusunit marluk Naalakkersuisunit toqqarneqartarput. Siunnersuulli una piviusunnngussappat tallimaasunit sisamat Naalakkersuisunit toqqarneqartalissapput. Tamanna tulluanngilaq ajornerpaarlu pissappat tamanna tusagassiornermut kinguneqarnerlorataannaavoq. Pissutaavoq siulersuisut pisortamik atorfinitsitsisrnerat, pisortallu aaqqissuisunik atorfinitsitsisarnissaa, taakkunanngalu tusagassioriaaseq aalajangersarneqarpoq. Taamaasilluni siulersuisuni amerlanerussuteqartut, Naalakkersuisunit toqqakkat, pissaanermik tigummiaqartut anguniagaannik tunaartaqalersinnaapput. Tamanna suna tamaat atorlugu pinngitsoortittariaqarparput.

Tamatuma saniatigut siulersuisuni ilaasortat katitigaanerisa allanngortinnissaat allaffissornikkut sipaarutaanaviannngilaq. Naatsorsuutigineqaralarpoq 150.000 koruunit sipaarutigineqarumaartut, taakkuli atuisartut siunnersuisoqatigiivinnut KNR-p siulersuisuinut siunnersortitut atuuttussanut siunnersuutigineqartunut toriaannaapput. Atuisut siunnersuisoqatigiivisa ingerlannerat 200.000 koruuninik akeqartussatut tagginneqarpoq.



Taamatullu oqareerluta taava Demokraatini paasisinnaalluarparput Naalakkersuisut kissaatigimmassuk KNR-p siulersuisui ilisimasaqarnerusut ivertinnissaat taamaattumik atorsinnaasumik allamik siunnersuuteqarusuppugut.

Siulersuisuni ilaasortat amerlassusaat taamaaginnassaaq atuisulli siunnersuisoqatigiisitaqarnissaannut isuma peerneqassaaq. Naalakkersuisut siulersuisuni ilaasortassanik pingasunik toqqaasassaaq siulittaasuusussaq ilanngutereerlugu. Taavalu sulisut siulersuisuni ilaasortassanik marlunnik toqqaasassapput. Ilaasortassat sinneri marluk Tusagassiornermut Ilinniarfimmit toqqaarneqartassapput.

Taamatut siulersuisut inuttalersornerat arlalinnik iluaqutissartarqarpoq. Siullermik siulersuisuni ilaasortassat Naalakkersuisunit toqqaarneqartartussat ikinnerussuteqassapput. Taamaaliornikkut qulakkeerneqassaaq siulersuisuni ilaasortat Naalakkersuisunut sullissisuunissaat pinngitsoortinneqassaaq.

Aappasaanik sulisut ullumimut naleqqiullugu oqaasissaqarnerulissapput, taakku KNR-mi ulluni naliginnaarni susoqarnerseq ilisimanerpaavaat.

Pingajussaanik naatsorsuutigisariaqarparput Tusagassiornermut Ilinniarfiup qulakkiissagaa ilisimasalinnik siulersuisuni ilaasortaqaalnissaa.

Taakku pingasut pissutaallutik Naalakkersuisunit qularnaarneqassapput siulersuisut siammasissut ilisimasaqarluartullu toqqaarneqartartussaammata siulersuisuni ilaasortat aningaasarsiornermut, inatsisinut sulisunut/aqutsinermullu ilisimasaqarluartut.

Demokraatini ammaffigaarput periarfissat oqaluserinissaat uangutsinnulli pingaarluinnaqqissaaarpoq siulersuisuni amerlanerussuteqartut allanit Naalakkersuisuunngitsunit toqqaarneqartarnissaat.



Kinguneqarluartumik oqallinnissamut qilanaarpugut aamma siunnersuut Kulturimut,
Ilinniartitaanermut, Ilisimatusarnermut Ilageeqarnermullu Ataatsimiititaliamut innersuupparput.